

摘藻堂四庫全書薈要

集部

欽定四庫全書薈要

集部

御選明詩卷四十二

詳校官原任主事

臣李斯咏

欽定四庫全書薈要卷一萬八千五百四十二

集部

御選明詩卷四十二

七言古詩七

秦夔

送人還松江

金陵城中花滿煙金陵陌上酒如泉
送君臨歧一握手欲別未別心茫然
足馬遙遙向東去黃金作鞭光照路
長安雖好不如家翹首吳門隔煙霧
君家遠在雲水鄉

正近吳王舊獵場海錯登盤玉脂滑鮮蓴出水銀絲長
荒亭鶴去空塵跡三高祠前秋月白惜君未得從君行
斜日無言正愁寂

登觀瀑亭

麻姑之泉天下名有泉不可無此亭奔流直下蒼崖裏
千丈玉龍飛不起鏗金碎玉聲潺潺恍惚置我匡廬間
銀河句好續不得日暮悠然騎馬還

贈虞永錫赴金庭塾館

西溪先生頭半白十年常作金庭客
慣說金庭山水清
嗟余俗眼何由識
新春示我山水圖
金庭乃在東南煙
浪之具區
洞天福地仙所都
靈芝瑞草無時無
危峰倒
插青天孤下涉
險阻連重湖
秋風颯颯吹黃蘆
白波漫天鴈驚呼
沙頭二老翁
衣冠一何偉
烏紗籠頭髮垂耳
笑看雲山弄雲水
就中一叟豪且雄
恐是近世天全翁
領客常遊湖水東
脫屣富貴尋崆峒
英賢遺跡轉眼空
好事寫入茲圖中
不然胡為避世士
被服却有今人風

余生亦愛金庭好對畫題詩心懌懌會約先生作勝遊
他日風流成四老

沈鍾

次石田先生用東坡清虛堂韻自述

休官寄鄂棲金沙食非庾廩門非衙深山甘尋麋鹿友
秋江耐種芙蓉花桑榆低懸遲暮景樵漁密結比鄰家
倚牀浪繙書剔蠹遶樹錯信兒打鴉每聞風颺詫仙籟
或指雪片疑瓊葩哦詩濫收瓦與礫款客薄藉瓜仍茶

野渡橫舟擽一繫嚴城警鼓驚三過桃源九谿路曾入
匡廬五老頭堪爬乾坤旅舍祇如幻歲月駒隙良足嗟
生平知己劍猶在直氣尚復冲飛霞

陸鈇

齋居閱東坡定惠院詩次韻遣興

前歲青綾卧玉堂今年樺燭春坊夜美景良朋往事中
清香宴寢疎簾下天空月白久不寐雪重枝高坐聞瀉
門外材官護衛嚴城頭烏尾依栖亞新春人事嬾不出

齋閣詩情誰復借歸扇玉帛未足誇撫景豐穰端可謝
天王垂誠在竹宮齊民望駕窺茅舍促辦誰催入夜釐
大烹已壓官槽蔗出陪正怯病軀免宣勸還思巨觥怕
貪榮戀寵不知極官謗紛紛得無罵

題畫

萬里青天起崖石韓愈城南之寸碧孤雲欲去且為留
轉眼蛟龍忽狼籍崖中獨樹挽青銅崖下流泉擲飛帛
峰巒屈折隱高賢花木蕭疎隔飛翺合浦洲前落日明

東風吹散笛中情
芙蓉半老臙脂苑
楊柳輕籠翡翠城
輕舟細馬平生願
畫裏題詩眼更清

李東陽

題程亞卿所藏劉進畫魚

劉生亦是丹青豪
近來作畫無此曹
平明退直呼濁醪
半酣脫却宮錦袍
戲將秃筆作鱗介
已覺四壁生風濤
風濤洶湧向何處
岸閣江空起煙霧
東風一夜吹水渾
翠鬣紅簪不知數
桃花柳絮時吐吞
輕繁亂行交繽紛

圓光倒射日成凸減影下沒天無痕羣嬉若共衆芳狎
遠逝忽與洪波奔千形萬化極幻化倉卒逢之安可論
就中巨者稱赤鯨卓犖頗似鯨與鯢仰窺河漢若咫尺
俯視江海如甕盆巖巒變風雨作走天吳驅海若流雲
掣電同揮霍噴沫浮漚滿寥廓鋒鏑參差見齟齬劒戟
崢嶸露頭角直遣飛騰動鬼神寧誇震撼傾山嶽若非
溟渤即洞庭不然豈得通幽靈幽靈汗漫入恍惚始信
丹青有奇骨劉生劉生良已工誰其愛者司徒公華堂

錦軸粲盈丈髣髴坐我龍門中龍門高高幾許葉公畫
龍龍出走此物胡為在庭宇知公自是人中龍會向人
間作霖雨玉如意金叵羅激高堂揚練波文王在治民
共樂君子有酒吾當歌我生解詩不解畫潦倒不覺雙
顏酡吁嗟乎吾當奈爾丹青何

荷鷺圖為薛御史作

秋山沈寥秋水闊一夜天風起蘋末萬籟凋餘錦樹空
繁花落盡紅衣脫鷓鴣鸕俱無聲沙邊白鷺如有情

幽禽相呼落日暝尺鯉下避寒潭清寒潭直下幾千尺
落羽回波共蕭瑟獨立遙憐海嶼青低飛不礙江雲白
詩家畫格還相宜却憶江南初見時雍陶池上風雨集
摩詰田中煙火遲吾身頗似巢籠鳥十年塵土長安道
萬里滄浪一片秋安得閒身此中老

題朱儀中雨圖

菰叢蒼蒼集煙渚山頭濕雲半為雨垂蘿繞屋茅覆牆
石燕林鳩似相語桃花落盡梅子黃南北湖俱茫茫

黃泥道路白頭浪知是江南煙水鄉
長安溽暑秋過半雨濕書牀盡糜爛
三年詩逋坐盈案拂君畫圖為君歎
閉門覓句無人催呼童卷送休徘徊
君看白石最深處紙背猶濕青莓苔

王世賞席上題林良鷹熊圖

坡陀連延出林麓孤鷹盤拏熊蹠伏
金眸耀日開蒼煙健尾捎風起平陸
由來異物乃同性意氣飛揚兩撐矗
山跑野掠紛路岐何事相逢輒相肉
側睨翻疑批亢來

迅步直欲空壁逐乾坤蒼茫色慘淡落木蕭颼滿空谷
羣豺斂迹百鳥停萬里長空齊注目是誰畫者誠崛竒
筆勢似與渠爭速坐間賓客皆起避階下兒童駭將蹴
當筵看畫催索詩卷帙不待高閣束平生搏擊非我才
欲賦真愁成刻鵠微酣對此髮雙豎酒令詩籌復相督
頓令拙劣成粗豪一飲步兵三百斛

劉尚質南樓題王舜畊山水圖

溪聲潺湲雜林壑山勢蜿蜒去還却浮雲欲起未起時

半在溪頭與山脚入空高鳥飛欲盡背屋斜陽慘將落
更無剩地與閒人總有紅塵何處著南畝老人雙鬢斑
筆法頗似高房山少年豪宕老疎放往往醉墨留人間
平生畫癖兼山癖一見此圖三歎息愧我不如樓上人
日日開窗看秋碧

題魯京尹所藏雙鷹圖

霜風撼撼空林響朔氣隨空入蕭爽兩鷹意氣殊絕羣
俯視平川如一掌玄雲著樹凝不飛野日照地寒無輝

搜身欲下不肯下似覺深山狐兔稀丹青落手翩欲活
講上驚看錦條脫江湖浩蕩煙水深萬里陽臺渺天末
時維八月炎暑空兩鷹角立如爭雄周旋九紘隘八極
此意豈在風塵中知公有才非搏擊我意亦欲辭樊籠
祇應共逐鷓鴣去去上丹山十二重

四禽圖四首

樛枝老樹幽巖裏山鷓雙飛掉長尾高鳴俯擲勢不停
似向春風矜爪觜山頭錦雞金作冠身披五采成斑斕

遠從紅日霽時見更向碧山深處看人言此物真奇特
同是山禽不同格休將綠水照毛衣祇恐桃花妒顏色
空山雨過枇杷樹黃顆纍纍不知數金衣公子正多情
驚墮金丸欲飛去海榴花殘紅子新沙上鳬鷺來往頻
每從水淺花深處遙見隔花臨水人山禽關關水禽語
脉脉幽期似相許莫負天晴日暖時一春江上多風雨
碧林紅葉驚飛鳥江上秋風下來早鴈去鴻辭煙水空
蘼葭落盡芙蓉老原頭鵲鴝如有知應憐歲暮得同棲

枝間戴勝聲不住應憶春園初降時山林動物各有託
野雉分明出叢薄見說豐年少網羅低飛不及高飛樂
江南山深冬日暖湖水無漸湖水滿幽林晚徑斷人行
落盡梅花春不管山茶花發爭芳菲翠翎蠟背相光輝
煙生錦嶼寒猶戀雪滿銀塘夜未歸野林落羽紛凌亂
回首青霄各分散溪上鴛鴦猶有情春來冬去長為伴
題夏仲昭墨竹橫卷蓋陳緝熙先生故物也

崑山夏老能筆畊開雲種玉看峭嶸千條萬葉入霄漢

世間草木空有名來持琅玕叫閭闔坐使燕石無光晶
北人貴竹如貴玉直以高價酬丹青衡開丈幅直踰咫
不見枝梢見根柢恍疑湘浦推蓬行颯雨驚飈過雙耳
九疑山高望不極影落洞庭清徹底靈籟時來天樂風
釣竿不動珊瑚水珊瑚水冷魚龍藏此翁一去魂茫茫
江山有神故物在環珮有聲涼夜長東吳老子圖書散
南國諸生思未忘重向玉堂修竹譜須將偃竹記簞簞
夜過仲家淺閘

日維乙未月丙戌青天無雲月東出舟人喧逐夜濤發
翻沙轉石紛出沒是時水淺舟在地牕門崔嵬晝方閉
牕官醉睡夫走藏倉卒招呼百無計民船棄死爭赴牕
檣倒樯摧動交碎舟人號咷乞性命十里呼聲震天地
我時兀坐驚春撞攬衣而起心徬徨同行無人僕隸散
獨與船月相低昂攀崖陟磴不得上咫尺如在天一方
流行坎止信有數向來蔑視淮與江霜風欺人衣袂薄
呼童酌酒累數觴燈殘酒醒牕亦過北斗墮地天茫茫

徐州洪蘇墨亭書坡老石刻後

有序

郡守蘇軾山人張天驥詩僧道潛月中遊題名十六字在徐州百步洪岸石石半入水水落輒隱隱見沙沫間篙師漁人不能識而崖石險絕又非大夫士所暇尋閱者故於世無傳焉成化壬辰余過徐放舟洪下畏險岸行偶見此字嘗為詩記之又八年庚子予與洗馬羅君明仲校文南畿歸工部主事尹廷用實理洪事邀坐蘇墨亭則此石已為

君所伐致置之亭壁矣因與明仲各賦一詩遺尹
君留之亭中九月望日

我昔彭城初泊舟岸行百步觀洪流手披荒蘚看古石
上有坡翁舊時刻沙衝水齧四百年字畫半滅風神全
我行見此三歎息此物乃在風塵間冬曹尹君真好事
自埽巉巖鑿蒼翠山靈助喜河伯愁白日驪珠照平地
孤亭素壁高巖嵒登堂見字如見翁山人在前僧在後
尚憶扁舟遊月中崖端刻頌唐宗業水底沉碑杜預功

直將談笑為故事似與百戰爭英雄高才直節古今少
片石價比千金同由來一代不幾見况我異世懷高蹤
憑君一搨數千本徧使四海揚清風

子昂畫馬卷

翰林學士真天人平生書畫皆通神自言少小嗜毫素
寸紙遍作雲煙痕老來意態盡物理畫馬欲過曹將軍
此圖似出西域種骨法權奇氣軒聳將身蹴地跼不前
矯首見人驚欲踊燕家死馬猶堪賣况此風神解飛動

在野須教一顧空登臺未覺千金重崔郎愛畫復好奇
向來得此信且疑為渠指點是真蹟老我聰明非昔時
圖窮忽見銀鈎筆復訝驪珠海中出江南贗本今已多
入眼自須分甲乙世人得者惟見一至寶逢時故難匹
從此高堂展玩頻明窗靜几無長日

讀柳拱之負外嚴宗哲主事楊應寧舍人倡和
長句戲次韻一首

詩壇森嚴陞復楯白戰雄呼氣難忍西鄰有客興亦酣

睥睨重圍目雙眦居然地隔如秦越或者神交同白蘋
故知宮角本諧聲復恐方圓不相準向來蹇鈍費鞭策
已分驚駘謝駉牝灰餘萬念偶一生腐木經秋發孤菌
諸君才力各強健東飛俊鶻西飛隼擬隨磅礴共盤旋
弱羽真愁向空墮霜天閉門坐不出背擁寒爐曲成蚓
強呵凍墨吟小詩力困冰毫如荷盾枯腸夜渴吻亦乾
綆短瓶空誰為引回首不如年少時滿堂坐客誇聰敏
韓公道德日已負后山精力空應盡逢場作戲亦偶然

不覺詩成為韻窘文章同時不易得三傑古稱吳富尹
君今並是湖南英鄉邑吾猶限封畛閒官未免鉛槧累
戶外催逋時接軫長歌終曲誰使予歌罷獨吟還自哂
書蒙翁先生書畫卷後

蒙翁書法天下豪坐驚風雨隨波濤有時意匠入幽眇
力與造化爭纖毫仰觀千年俯一世紛紛弄筆皆兒曹
書家論定價亦定須識我翁人品高戲將水墨灑縑素
如飫梁肉甘醯糟殘山剝水世莫睹流落數紙青蒲萄

一登翁門遂隔世齒頰未獲霑餘膏如遊神山見石髓
頃刻再往不復遭莆田鄭郎得寶藏明珠雜佩金錯刀
摩挲兩眼百過讀使我涕淚盈青袍三年留玩一朝去
久假似覺歸心勞泰山東顏日西墮欲往從之中鬱陶
詩成起立歲將暮空庭短髮空蕭騷

鷓鴣圖

鷓鴣啼處春江綠日暮淒風吹苦竹相呼相喚不停聲
萬恨千愁啼未足有時格磔還鉤輶此聲欲斷無時休

風低不渡三江水竹冷先驚八月秋我家舊在湘南住
猶記曾聞鷓鴣處不似雲安有杜鵑聲聲道不如歸去

墨梅一首

江邊老樹根如鐵枝上繁花亂成雪千葩萬蕊一時開
剛值江南好風月川迴谷轉山路微春來無處無芳菲
行遲似愛影在地坐久不知香滿衣江南此景看不足
江北見之如見玉丹青紙上漫成塵桃李擔頭空過目
平生知己孟與林招之不來勞我心看花載酒不知處

灞雪瀟瀟湖水深

平湖十詠為過郎中大僕作

錄六首

武湖春色

春來武湖綠春去武湖深清波帶碧草幽鳥啼芳林寧
獨知春來與春去長在武湖湖上住

三寺雨鐘

朝鐘晴昏鐘雨朝鐘滿空山昏鐘遙遙不知處山僧報
客客不來又逐溪風過溪去

六橋晴市

六橋東西南北水水橋為邨水為市昨日雨多今日晴
高樓翠幔紛縱橫搖湖船卧明月歸來夢作揚州客

東田社鼓

日之出東田東鼓填填走社翁剗肥羊擊壯豕舞復歌
社神喜但願年年好風雨儂衣有桑食有黍長迎社神
擊社鼓

西浦漁罾

儂家住西浦兒童識冒暑冒高岸濶秋水深湖上魚蝦
賤如土待他時歸挂罾功成自買扁舟去

北原牧唱

北原草青牛正肥牧兒唱歌牛載歸兒家在原牛在坂
歌聲漸低人更遠山蒼茫水清淺

姚綬

折枝芙蓉

芙蓉花隔江水美人盈盈幾千里何年濯錦墮新紅水

面西風吹不起我欲舉之在木末方舟翻愁江水闊芙蓉花似人面柳眉不在秋時見墨池為爾閒寫生鴛鴦鎖合長生殿重咨嗟芙蓉花擲筆浩歌行踏沙

吳興弼

聞笳

扁舟晴泊在渚沙葦苗滿目稀人家夜江漠漠星橫斜東風吹鬢憐春華隔江維舫寂無譁數聲悲響空中笳響徹碧霄哀更加悠悠綠水天一涯

鎡師邵

五馬圖

渥洼水中產龍馬房星之精自天下星奔電掣勢莫當
豈比尋常駕轅者竹批峻耳鐵作蹄雄姿颯沓精權奇
日行三萬等厯塊未許八駿相追隨今觀此圖凡五匹
畫史經營各臻極就中一匹是真龍異質殊形人莫識
滄溟氣含雲霧涼蹴齧顧盼思騰驤神奇變化在頃刻
素壁高堂安可常

姚翼

春日與懷用和遊鴛鴦湖

鴛鴦湖上春波平鴛鴦飛入菰蒲鳴秀州女兒肌骨輕
蘭舟蕩漾微風生何人打鴨鴛鴦驚春雲遶郭花冥冥
夕陽落盡初月明誰家小閣聞調箏

陳昌

題江湖勝覽圖

馬卿子清而癯狂非狂迂非迂不愛養浮丘伯之黃鶴

不愛釣任公子之巨魚年來只愛江湖居江湖風月足
清興筆牀茶竈尋常俱船頭紅拂唱巴曲船尾黃帽歌
吳歛歌吳歛唱巴曲妙舞清商間絲竹白日歡遊殊未
足復擬黃昏秉銀燭風帆催送寒山鐘直向垂虹橋下
宿

王仲輝

題王舍人墨竹

我本山野人夙抱煙霞疾何處慣經行松篁與泉石晴

牕偶看琅玕圖淋漓醉墨傾金壺崇岡怪石相高下冷
雨疎煙半有無數竿晴渭川日暖春風輕數竿老嶰谷
千年霜雪飽數竿敲楚江歲晚寒風吹數竿側淇澳秋
深雨蕭瑟千竿萬竿難盡名林巒髣髴清風生交枝直
幹平安態勁節虛心君子情對此怡然樂清賞撫卷無
言發遐想煙雨濛濛語鷓鴣詩懷長在湘江上

朱翰

題畫

南遊匡廬山不知幾萬丈盤回直至香爐峰五老高高
儼相向初疑三山屹立東海中又疑青天削出金芙蓉
世人蹤跡不到處物色匪與人間同天梯石磴無窮極
一片寒凝古苔色千歲桃花別樣紅四時瑤草非常碧
就中有徑深復深白雲洞口猿哀吟一聲長嘯白日晚
神仙眇漠無由尋須臾下來心目爽便欲移家擬重上
東風回首塵茫茫明月滿天勞夢想

張淵

題林和靖秋深二帖與石田同用坡韻

乾坤悠悠書兩幅墨光深照西湖綠人間翻覆似浮雲
此紙完全如璧玉少陵瘦硬真入評右軍姿媚宜云俗
想當援筆對梅花誰用官奴寒把燭自然心畫得天妙
一字百金酬不足乃知形貌列仙癯石帶煙霞山少肉
巖巖氣象高百世奚假文章身後錄東坡去後古祠荒
月下不聞迎送曲遺跡君家豈偶然天遣清風激修竹
憑君開卷望孤山三灌薔薇咀秋菊

銘泰

雪景畫

高堂怪底寒侵骨
遠山近山銀突兀
細挑松火靜中聽
蠶葉蟹沙聲彷彿
水邊老屋伊誰家
爨煙幾縷隨風斜
出門一白已無地
蹇驢何處尋梅花

題戴文進西湖圖

錢塘西湖天下奇
浮光萬頃澄琉璃
仙宮佛剎湧金翠
簫鼓之聲聞四時
六龍扶日消春霧
畫船撐過茅家埠

吳姬雙唱遏雲歌，驚散鴛鴦與雁鷺。
水亭入夏薰風來，鏡裏荷花高下開。
蔗漿酪粉出水碗，對花一飲三百杯。
梧桐葉脫屬秋至，籃輿尋僧靈隱寺。
深洞老猿呼不應，和得賓王舊詩句。
玄冥剪水落九天，孤山突若銀螺然。
玉驄駝醉探春去，紅椒已破疎籬邊。
戴進胸中有丘壑，揮灑新圖使人愕。
羊腸路口樹陰陰，鴨嘴灘頭沙漠漠。
和靖東坡不可逢，白雲常護青芙蓉。
寄謝山靈莫相拒，早晚來聽煙際鐘。

吳敏

洗河

洗河水落秋風早菱葉蕭疎菱角老河邊漁船如缺爪
白頭夫婦團團好往來賣魚兼賣菱官府近無漁課徵
夕陽醉卧風吹鬢

涂俊

新豐主人

客舍新豐往來熟主人相留上房宿門外人聲雜暮鴉

尊中酒色浮春竹鄰家女兒愛月明玉纖窓下理銀箏
一曲涼州腸欲斷行人猶在武威城

王佐

畫竹

瀟湘綠玉崑崙石移向高堂之素壁四座涼風帶雪吹
半窗疎雨和煙滴九疑夢斷瑤瑟寒貼雲影落雙飛鸞
霓旌掩冉欲歸去美人持贈青琅玕也曾拂拭蒼苔色
坐弄參差楚天碧曲終日暮山鬼啼自寫幽情寄相憶

程敏政

題安城彭學士山水圖

何人結屋青山裏終日開窗見山喜近峰錯落走簷牙
遠岫蜿蜒插天觜澄江一道山前過短櫂平分浪痕破
船頭水氣綠侵衣載酒高人面山坐石泉下衝沙渚渾
桑榆接地成深邨柴扉欲扣不可到或有細路通雲根
竹鶴老人名畫手半幅生絹大於斗水分山斷意無窮
目送飛鴻渡江口安城先生塵慮脫南望鄉人楚天闊

高堂永日對山歌肅肅涼風起蘋末

暮雨夜泊

黑風摧山雨如注未到下邳無泊處暗中雜還人語聲
且逐淮南漕舟住淮南漕舟三百強粉字舵樓成堵牆
輪更轉箭鎮相續似覺人人嫌夜長滅燭悠然倚牀坐
遠村曙雞聞一個前途早有役夫來岸東相呼岸西和

題蔡揮使所藏林良雙鵲

老木長梢半空起影落君家素屏裏枝間雙鵲不飛去

似向高堂報君喜涼風曉入庭戶清主人坐對宛有情
眼前豈獨惜珍羽耳畔忽疑聞好聲亦有娟娟白頭鳥
相顧徘徊若相保廣東畫史深可人生態無窮意難了
主人堂堂真壯夫喜受文士相追呼征蠻不帶嶺南物
衣衾之外惟此圖堂下有兒堂上母客至於圖飲醇酒
呀然一笑共平生崔白邊鸞竟何有鵲兮鵲兮不可求
願君身共張梁州不須椎石取金印看爾生封忠孝侯

古箭渡

古箭渡頭春水急古箭鋪下春泥溼風吹一道雨微收
黑壓四山雲未入郵亭飯罷聞竹雞肩輿扶過蒼崖西
行人道側亂相指雨陣復來雲脚齊

錢舜舉清暉堂所寫戲嬰圖為臨淮顧謙賦

海榴花開白日長繡屏十二雲錦張沈沈午漏下初刻
搔頭不整慵來妝一姬南面金縷裳兩姬夾侍相頡頏
頎然圍坐看兒戲斑管雕弧堆象牀三姬鼎足如雁行
玉階隨步鳴雙璫以口撫嬰愛入骨笑語彷彿聞昭陽

一姬下坐收錦襦洗兒自與澆蘭湯娟娟秀若化生子
銀盆水暖芙蓉香一姬轉盼殊未央拭巾在手明吳霜
小鬟兩兩意閒適紈扇不動薰風涼苔溪畫史推錢郎
柔思獨步丹青塲摩挲舊本豈易得流傳遠自清暉堂
才人不說顧長康鑒賞欲博千金強螽斯麟趾尚可作
為君擊節歌周王

題田家娶婦圖

徑草如煙柳如幕日上茅簷鼓聲作田家遣女不出村

東舍西鄰隔墟落新婦駕牛兒跨驢家人後擁翁前驅
兒家舉酒攔道勸舅甥幾世同桑榆耳邊阿嬈私屬父
肩上嬌嬰肯離祖歡聲一路到柴關野伶山歌柘枝舞
兩門彷彿朱與陳鄉儀簡古民風淳華筵肆設競珠翠
想見紛紛京洛塵婦饑男耕罷征戍安得移家箇中住
長因擊節頌年豐不作催租打門句

莊祖

蒼松為許志完作

箕山老人松樹圖開卷淩亂千人呼畢宏已死更誰手
南京老盛天下無此松畫本得何處元是公家挂瓢樹
虬髯偃蹇老鐵蟠雷雨蒼龍未騰去嗚呼此樹百鍊鋼
數千萬變冰與霜忠臣義士我所拜山中萬古文天祥

章懋

賜粽

細葛香羅試新暑太平時節重端午五兵辟盡百邪消
不用釵符懸艾虎九重天上宴芳辰菖蒲香泛宮壺春

青青菰葉包金黍玉盤滿貯頒羣臣小臣何幸遭明主
承恩共醉薰風裏願題宮帖獻新詩納忠竊效歐陽子

賜扇

祝融南來司火令大地鬱蒸如坐甑蓬萊宮中夏日長
南薰有歌思解愠尚方新造宮扇成削玉裁雲形製精
內侍傳宣賜卿士一揮頓覺炎塵清魯公詩句平生志
願與君王驅酷吏安得牧守皆循良遠播仁風慰黎庶

張弼

花鳥圖

天台山裏劉郎來
玄都觀裏劉郎去
人來人去花不知
金衣鳥啼春滿樹
綠窗孤眠如玉人
聞道春歸未識春
欲起推窗看花鳥
還將羅扇障流塵

送僧還邵武

義師彈琴兼寫竹
指端觸處清風足
廣陵明月十二樓
瓊裾仙袂同追遊
瀟湘晴雲數千里
桂楫蘭舟弄煙水
梵餘定起白晝長
冥心今古何茫茫
我賦新詩送君去

靈風忽偃窗前樹

梅居

鳳凰山下梅花屋俯仰乾坤盡香玉逋仙寂寞三百年
塵土孤山昧人目清詩往往落人間疎影暗香今始續
曲闌小几神與交宛見杖藜巾一幅漫呼焦尾洗塵襟
獨把匏樽酌溪綠興酣不計春淺深陰風颼颼雪簌簌
萬頃玻璃舞鶴顛八窗雲母飛蛾撲蠶塵不到只仙家
何必洞天三十六

題畫

大山如龍欲飛去小山盤盤如虎踞近山晴露雨三峰
遠山微茫不知數劉君家住山之陬蒼藤古木涼陰稠
步月頻穿花裏徑看雲別起水邊樓隔林松吹含清響
古色莓苔和雨長案頭六籍時卷舒沙上羣鷗日來往
近來得志上天衢皇華四牡常馳驅道逢江陰何太守
為寫江南山水圖朝回挂向碧窗曉滿幅煙嵐寒悄悄
坐中都似舊遊蹤只欠清音一啼鳥

林瀚

題王叔明夏日山居圖

黃鶴山人標格清胸中丘壑何縱橫興來捉筆一揮灑
蒼崖翠石煙雲生人家住在山之麓隱映門牆蔽林木
橫經讀罷鼓瑤琴薰風微動窗前竹司業先生最愛山
無緣長得青山看時張此圖向高壁彷彿揚子江天寬

李傑

題王孟端松泉圖次饒介之松濤韻

山椒怪石蹲如羝松崖巉巖不可梯蒼濤洶湧翻地軸
白日晦冥天為低高枝棲鶻巢欲墮哀鳴何處求其雌
初疑龍蛇相格鬪鱗鬣無乃多傷夷又疑羣仙互來往
翠蕤羽節紛初初影作大陰連巨壑根盤絕澗滋寒漪
何人圖此心獨苦九龍山人揮灑之筆端生意妙莫測
真宰上訴天應悲驚風颯若坐間起毛骨凜凜難禁吹
林泉逸趣我所嗜相對不覺心神馳世間真假俱一夢
以夢非夢良亦癡卧遊何必謝公屐千峰遍閱消移時

畢韋一去藝中絕後代未聞工者誰山人能事寧止此
布衣上結明主知圖窮載誦醉漁作此翁胸次亦已奇
歌聲悲壯意超脫不似杜老憂時危豈期兩美偶相合
有聲之畫無聲辭百年勝賞不易得俛仰忽復令人思
雪泥鴻爪宛然在風流雲往何由追後來視今今視昔
揮毫試和松濤詩

樊阜

題山水圖為劉廷信都憲作

我家本在山中住讀書慣識山中趣偶落名塗塵眼昏
見山便欲還山去南陽先生官態無半醉示我雲山圖
持向簷前再三看青山突兀雲模糊百尺飛泉落松頂
顛屋倒擗晴煙影神仙樓閣牽翠霞薇帳圍香晝長靜
人家三兩溪南村桃李成行門對門石徑斑斑過新雨
花落點破莓苔痕鷗鷺飛迴映沙島夕陽網曬漁舟小
不是苔川與輞川仙都山下川原杳先生指我山之西
茅屋數間依竹低茶竈藤牀舊栖隱異人墨客多留題

看圖纔了眼初醒人間有此真佳景由來泉石絕纖塵
當與先生分管願先生大笑清風生岸幘佯狂雙鬢星
題詩卷圖謝鴻鵠浮雲散盡長空青

吳寬

送胡彥超

年過四十不作官還將短髮籠儒冠平生一經已爛熟
胡為挾入橋門觀前年鄉書名始刊曲江又避春風寒
重來橋門住三載打頭矮屋聊盤桓朝齏暮鹽不滿盤

何須故人勸加餐日高對案笑捫腹自有五色之琅玕
側身西北望長安眼中一朵紅雲團天門欲往澀如棘
若比蜀道尤云難嗟哉出處誰得似頗似吳下吳生寬
吳生作詩忽盈紙送君還到春闈裏春闈多士多如蟻
勿將老少分憂喜君不見韓昌黎張童子同是陸公門
下士昌黎文章如皦日童子聲名逐流水人生傳世有
如此區區科第何難耳

謝孔昭臨黃大癡畫

大癡道人避世士移家舊隱虞山裏早年能畫老入神
落筆虞山宛相似深林依稀邨塢重水口近與昆湖通
高岡硤硤勢欲墮此老前身黃石公百年以後誰其亞
昔者吳門稱老謝案頭臨畫似臨書咄咄逼人真可詫
風流前輩杳難攀謔語空傳謝疊山窗中遠岫依然在
天際春雲仍自還

孔昭善寫山
自稱謝疊山

雪中李世賢招觀東坡清虛堂詩真蹟

茫茫巨海流銀沙光分民舍并官衙詩人說詩等說法

四坐繽紛天雨花寥寥小巷絕人跡誰肯拄杖過吾家
曲中合沓失朱鷺谷口聯翩多白鴉青葱搖落上林苑
一夜亂綴瓊瑤葩故人相送定石炭惡客好飲惟江茶
清晨忽報有蘇墨折簡邀看門頻過形疑蝦蟆似曾壓
技癢蟣蟲誰為爬料知刻本來廣右醉筆漫滅猶堪嗟
坐當大雪發長笑新酒正熟浮紅霞

是日往觀果刻本蓋世賢招飲恐客不至故給
爾乃復次韻

出門騎馬踏雪沙玉堂吏散成空衙何人手剪吳江水
而我目眩梁園花客居長至歎寂寞賴有東鄰仙李家
試開泥尊香潑蟻却笑石本光翻鴉清虛堂中事已往
妙墨零落隨風葩空腸啖盡元脩菜渴吻煎徹庭堅茶
詩成一紙來萬里峒石至今椎密搗濃書鏤把純綿裹
深刻蟬上潮泥爬似人可喜非浪語與客爭觀還共嗟
莫言此幅字漫滅夜久屋壁飛晴霞

明日世賢持啟南雪嶺圖索題復次韻

小徑升堂新築沙退朝無事還私衙誰移雪嶺入我屋
老眼白日疑昏花坐游未覺足力倦倏過野店仍山家
淺溪舟膠集凍鴨空谷屢響翔飢鴉狂風入林一攪動
零落玉蕊兼珠葩此時誰埽林下白急欲往煮僧房茶
忽然仰面見高寺扣戶還須持馬撾長安十年走薄宦
對此似將塵土爬西湖尋僧天欲雪蘇子故事今人嗟
清虛舊韻更可借捧硯獨無王子霞

偶見元李希蘧提舉遺墨乞歸賓之益希蘧其

先世也因賓之作海月菴記為謝以此酬之

遺墨持歸走僮僕想見開緘重薰沐百年珠玉慨沉埋
袖拂蛛絲光奪目遂令短紙一尺餘價壓書巢三萬軸
乞鄰與人真自慚藝苑酬功百言足夜歸解帶不成眠
海月亭亭當矮屋琅然烏鵲忽驚飛月下新篇已堪讀
湖湘文種傳一家前有希蘧後懷麓吳人再結文章緣
几上分明留此幅錦囊收貯莫教遲俗子無知將手觸
後世諸孫更好文還向吳人獲珠玉

爲屠大理題石田畫

生絹丈許畫者誰石田老人今畫師年來都下家家有
此幅吾知出親手筆意縱橫信所知夾岸翛然已疎柳
溪陰欲渡無舟楫萬杙成橋遠相接何處詩人跨瘦驀
破帽欹風黏落葉兩山對峙開高闕豁豁梵宇容千間
半空丹腹勢突兀雪竇天台真等閒老人昔共遊虞山
此景彷彿曾躋攀昆湖蕩漾臨几席水繞漁莊凡幾灣
京華十年走塵土看畫分明能破顏山林在望鳥飛倦

金方口月台
卷四十二
春到江南吾欲還

題許道寧秋山暮靄圖

遠山近山翠浪傾
愛此萬疊秋初晴
已多浮雲巖下宿
只有暮靄空中生
草樹紛紛縱復橫
風回落葉填礮坑
哀猿啼處日將暝
谷口不見樵夫行
重洲複渚望不極
漁舟獨出沙鷗驚
三山二水昔人句
彷彿當時登石城
何如攢蹙尋丈裏
一目千里當前呈
畫家意匠勞經營
墨氣濃淡皆有情
平生見此真有幾
不負長安許道寧

殘山豈合推馬遠寒林亦宜矜李成世間神品吾所遇
沈老舊藏高克明二圖作配實相稱品格豈待宣和評
嗚呼人言名畫真是名一笑頓覺千金輕

渡口驛遇風

黃沙障天天半昏砲頭風急萬馬奔何人去塞土囊口
天與河流一色渾曠野麥苗纔尺許只見風來不見雨
雨師風伯不相能彼蒼高高奈何汝

春溪聚禽圖

春溪遠發春山中一夜好雨溪流通綠波泛漲渺無際
但見桃花千樹紅鴛鴦鸕鷀何容與散亂中流錦為羽
倉庚獨似避遊人去踏花枝落紅雨草深哺子芳洲晴
葉暗仍聞求友聲展圖便有會心處放櫂欲作春溪行
玄裳縞衣彼何者爲戀高松倚平野莫論鴻鵠志安知
名字俱標在埤雅

賦黃樓送李貞伯

維河有源星宿同導河積石思神功濁流汗漫失故道

積石却與澶淵通平郊脫轡萬馬逸一夜徑度徐州洪

徐州太守蘇長公夜呼禁卒登城墉一身未足捍大患

豈無木柵兼竹籠戲馬臺旁二十里有堤橫亘長如虹

高城不浸三版耳挽回魚鼈仍耆童防河錄成天有工

黃樓高起城之東五行有土可制水底用四壁塗青紅

太守登樓賓客從舉杯酌水臨長風河伯稽首受約束

不敢更與城爭雄水流滔滔向東去紆徐演漾殊從容

負薪投壁竟何用漢家浪築宣房宮自公去後五百載

水流有盡思無窮我生慕公公不逢安得置我茲樓中
潁濱淮海獨何幸留得兩賦摩蒼穹鳳池舍人今李邕
南行別我何忽忽登高眺遠必能賦封題須附冥飛鴻
楊一清

畫水

何人筆力真如杠解衣盤礴堂中央研丹吮墨試揮掃
坐驚雲水生微茫滄波奔騰動地吼靈派迤邐連天長
長風飄搖浪千疊咫尺應須萬里強如登崑崙望青海

蜃樓鮫室騰輝光洞庭冥冥不可測日月出沒蛟龍藏
黃河之水天上下吞吐四瀆傾太行江流浩渺自西極
直與中國為巨防南人慣見且目眩北客倉卒心彷徨
平生樂水固天性徒以聲律相鋪張豈若丹青逼真貌
移將地軸歸毫芒畫工神思乃如此不獨李吳能頡頏
恨不前身為博望仙槎無路通銀潢中流擊楫亦有意
氣吞雲夢非荒唐高歌臨風發清嘯仰天四顧增慨慷

題畫

秋江瑟瑟葦青數行朔雁歸寒汀黃葉飛殘樹如戟
天風萬里開虛明乾坤此景信奇絕遙山正對林間亭
埽石焚香白鶴舞臨流鼓瑟游魚聽中流有客初揚舠
長歌激烈凌高冥匏樽五夜載赤壁鐵笛一聲浮洞庭
幽尋奇問各有志不然肯向洪波經揮毫作圖圖者誰
王維孫子筆意清由來意足乃佳畫俗夫指點求真形
詩成欲借并州剪與子對面分滄溟許由秦地空馳逐
完璧且須歸趙卿

題沈石田山水贈高鐵溪貳守

嗚呼絕藝多天成吮毫妙泄天之精胸中倘有萬丘壑
氣運潑潑隨風生古人縑素多漫滅零落數紙令人驚
按圖索駿竟何事如舍其骨求其形大江東南石田老
山川風味嘗應飽門前索畫如索逋墨汁朝朝為人掃
大窮天地細蟲魚信手為之翻大好此圖此景知何時
煙雲不礙山城曉坡陀縈複路逶迤一峰特立蒼冥表
山北山南青未了處處琪花雜瑤草山頭老榦屈鐵回

山下髯龍何天矯山坳靚深堪結廬翠竹為帷樹為葆
青鞵布韞秋復春幾送餘霞落飛鳥松根老人行復休
醉歷崎嶇歌窈窕足音空谷已難聞相逢且試開懷抱
乾坤安得此區寰我欲從之心慄慄不是匡廬是武夷
細觀無乃天台道人言此格黃大癡意在筆前非藉藁
春蠶見物繭即成或有神功為施巧世間真贗不可知
夜光魚目翻相嗤好事之流滿天下君看賞鑒者為誰
鐵溪道人房山後平生毫素常在手近時朝士能丹青

永嘉三子黃姜柳君今並起稱四豪俗夫吐舌羣工走
公餘坐我池竹邊徧檢瑤笈翻牙籤判評好惡析幽眇
如以藻鑑分媿妍酒酣指點到石田把翫再三真可傳
果然名下無虛士屬物紛紛空賣錢感君意氣服君識
願比干將當留別此人此物不易遭在我在人誰失得
珠光合浦浮雲濤豐城劍氣凌碧霄君莫展向風雷朝
只恐精靈化神物騰空一去難為招

呂紀雪圖

玄冥令嚴氣栗烈釀作江城三日雪朔風捲地天冥冥
四顧青山黯無色是時同雲凍不收咫尺川梁成阻修
灞陵豪客方閉戶剡曲幽人難放舟山禽在原半在隰
欲飛不飛毛羽濕渺渺平沙落雁多蕭蕭古木羣鴉集
天寒日暮恒苦飢欲覓顆粒將安之長安貧者亦無數
遑用恤此禽蟲為四明畫史清狂客決皆大呼聲裂帛
畫裏風情祇自知賦罷令人三歎息

畫鴈

江岸蘆花秋簌簌江頭旅鴈羣相逐啄者自啄宿者宿
昨夜南樓聞北風天長水闊雲濛濛何當舟一葉權入
蘆花叢

御選明詩卷四十二

欽定四庫全書薈要卷一萬八千五百四十三

集部

御選明詩卷四十三

七言古詩八

文林

張憲副山水障子

山高出雲在平地千村萬落連春水乾坤氤氲元氣濕
江湖滿地流瀾瀾模糊雜樹綠滿眼毫末閑花紅半壘
忽見芳洲草溼間微露樓臺煙雨裏山家茅屋晝不關

背喧高閣深厓間山人對坐奕不語客載小舟何時還
斜橋引出瀼西路欹岸直抵涇南渡開圖恍入洞庭遊
又似天台靈隱去耳邊汨汨聞谿聲堂上真疑結嵐霧
蓬萊閬苑想在此青鞋布襪宜相顧試問神仙結遊伴
却我冠裳塵土滿幾時置我圖書中還似神仙更蕭散
王鰲

海蝦圖

茫茫大海浮穹壤日月升沉鼇背上其間物怪何所無

海馬天吳大如象有魚如屋鱉如帆蝦最細微猶十丈
鬚鬚怒氣須如戟力戰洪濤欲飛出江湖魚蟹總蜉蝣
畜眼平生未曾識畫工何處寫汝真夢中曾到長須國
黑風吹海浪如山魚龍變化須臾間從龍願作先驅去
去上青天生羽翰

送鍾欽禮還會稽

會稽山人其姓鍾丹青之外詩仍工若耶溪上弄雲水
誰將姓字徹九重文華殿前見天子受釐三日居齋宮

東廂落筆風雨疾指盼屢得迴重瞳重瞳一一分甲乙
御筆親書為第一峯巖慘淡李營丘煙雲滅沒王摩詰
詔令內府賜鱗蹄又向邊城落戎籍山人拜舞前致詞
草茅何幸逢明時金坡玉瑣天上見惜臣老矣無能為
鑑湖一曲臣所好細草幽花夢中到敕賜烏紗作外臣
白石清泉恣游釣雲浩浩江悠悠山人去矣誰為留人
生雖云故鄉樂大隱金門亦不惡君不見東方朔

王弼

贈龐生吹簫

寒星點點秋雲薄
白日離離映寥廓
哀商怨徵動高堂
想見梧桐滿城落
青年白晷吹者誰
龐子風流妙音樂
自從五月來長安
久別吳湘舊江閣
吳湘江上曾一吹
江水江煙青漠漠
孤舟嫠婦不得眠
四顧長風起蕭索
紅塵向來聽者稀
鳳喉龍吻如扃鑰
秋來見月苦思歸
不覺悲涼指間作
此曲本自仙家傳
掠舟曾送西飛鶴
燈昏夜靜初聽時
小雨先來洗城郭
明朝却上東坡船

此地憶君成寂寞縱有新聲何處聽
蘆花月暗楓橋泊
奉使保定諸公餞別屬予為倡

平居雅愛重九名
西城乞花過東城
眼中一壺又長滿
花開萬事余不管
詩情酒量雖不同
冷淡竊比陶家風
婦亦忍貧無許語
手壓糟牀響秋雨
諸君來尋意疊重
舉杯浮白不相容
屈指筭我行色近
只恐歸來花已盡
我醉突兀如堵牆
請君作歌歌襄陽

遊趵突泉

濟南歷下多白泉白沙幾處涵風煙郭西趵突更神異
平地一朵白玉蓮浪花滾起千層雪此中疑是蛟龍穴
靈藏歲久變妖怪精氣上湧成涎沫餘波散漫淵復渟
溪風冷冽山雨青微霜初下鴈秋浴落月漸低猿夜聽
窮源我欲溯川陸舊誌虛傳自王屋冥茫難測造化情
聊寄泉亭漱寒玉

彭綱

詠刺桐花

樹頭樹底花楚楚風吹密葉翠翩翩
露出幾隻紅鸚鵡

趙寬

題蘆溝曉月圖

銀河半落長庚明城高萬戶皆雞聲
長橋臥波鰲背聳
上有車馬蕭蕭行蒼煙淡接平蕪迴
沙際朦朧見人影
舉頭一望天宇高殘月蒼蒼在西嶺

沈石田百鴨圖

柳塘流水春泔泔誰放百頭花鴨羣
石田老翁真好戲

點染霜毫成錦雲錦雲歷亂不可數飲啄浮沉散還聚
白瑩翻令鷗鷺猜絲鮮更被鴛鴦妬菰蒲劒芽一尺強
水香煙暖任回翔正憐身上無泥滓安用人間覓稻粱
洞庭之波連笠澤深綠晴搖漢江色甫里先生得意時
自挈雕闌引文翼我家恰與天隨鄰慣見毵毵弄碧鄰
就中亦有能言者不取橐金驚使人

邵寶

小孤山

昔聞砥柱黃河中萬古坐鎮狂瀾東小孤乃是江砥柱
特起不與羣山同羣山隨江鋌奔馬愛此石筍凌蒼穹
孤哉孤哉本天造一任巨浪垂長風節宣夙受神禹戒
滔滔不礙江朝宗我來信宿彭澤下咫尺仰望神妃宮
翠煙霏霏落杯酒千帆閱盡澄潭空舉杯酹江江月白
隔江縹緲留青峰便當載筆賦東海三山點破雲冥濛
雪中題陳工部畫用蘇韻

馬蹄踏遍秋風葉客懷還賞長安雪焚香小院對此圖

此人此景俱清絕恍然不識是何方凍雲壓峯峯欲折
草亭孤坐非君誰閒從水泡觀生滅秋林老筆逼夏珪
千載風神一揮掣得來價直奚可論萬鎰黃金千綵纈
羨君平生有高趣下視塵寰真不屑明朝持此歸江南
小舸乘風去如瞥也知匠意君自得我為題詩皆贅說
欲分半幅遮眼前剪刀安得并州鐵

醉石為王翁賦

湖上秋容淡如拭有人時卧林間石石邊有路通醉鄉

夢邪真邪人不識人有託物無情石可醉亦可醒一聲
何處滄浪清

江雨來

西津渡頭江雨來雨點入江江水回雲飛逐風沙走石
只尺不見東岡臺臺榭叢叢還可望臺上看江更奔放
明朝擬下鄱陽船月色浮江水微浪

儲巖

房山

我行京西三百里日望燕臺歌易水春風著眼到房山
不放黃塵吹馬耳煙嵐護雪不肯銷層峰相揖如相招
千金枉購尚書畫何如平地橫生綃晚來頃刻巖姿變
急雨漫山颯銀箭斜陽一抹亂青紅似與詩人供戲玩
胷中丘壑句傳神聞道劉公下筆親太華中峰五千仞
人間何地卜東鄰

鮑楠

題畫作

茅齋半食蒼巖腹老樹如蛟睨寒綠出門買得東吳船
載酒歸來江上眠刻却橫洲一千尺長將醉眼傲江天

石瑤

送伍朝信守寧波

官柳風柔拂酒盞渭北江東意何限五馬誰驅高蓋車
畫省秋雲猶滿眼纍纍肘印膏帶黃太守年纔三十強
閭門不敢鳴騶過里中長者多父行高堂日遲采衣舞
一觴一咏聲琅琅紫薇鉅公顏色揚諸孫繞膝兒繞牀

牀頭經史映簪笏膝下歡娛殊未央親恩君寵兩磅礴
膏雨還隨使車落深村無吠厖公府多神雀愛月還登
鎮海樓尋幽或到燒丹壑鏡川幾曲春澄澄人言使君
如水清棠陰無事坐舒嘯惟聽江聲雜鳥聲

羅玘

泰和禱雨有感為吳德純作

金華山雲如紙薄澄江赤日爍欲涸田家生怕牛餓死
滿田焦禾任牛嚼禾盡牛肥尚可為縣吏催租出牛縛

縛牛到市多賣錢了租背上無膈膊新傳縣官昨夜到
坐席未暖行出郭西郊驀地陰雲生狂雷一下顛快閣
雷聲轉大人轉驚兩耳何曾聞雨落雷收雲散天一色
只見高田有魚躍疾忙牽牛趁夜歸覓石踉蹌磨錢鏹
君不見縣官騎馬入縣門猶向山頭望雨脚

夏鑛

送吳黔陽

君未到黔陽我憶黔陽路黔陽道路入楚雲他日雲中

會有君君今向何處還望天台樹天台路遶萬重山白
水穿山流日暮君歸不得住我歸恐君去君去鳴琴隔
湘煙飛聲直到君王前呼取調舜絃

沈周

題陳侍御畫竹

鐵面郎官掃秋雨一夜秋聲落人耳楚歌唱斷碧雲愁
招得湘靈來筆底湘靈倒拔青鸞尾翠袖拖風濕江水
水遠山長不見人惟有千年淚痕紫

題錢舜舉漁樂圖

長川無風縹秋碧鴨嘴平灘引南北水楓脫葉荻花飛
獨許紅龍占秋色東船老漁罟魚立手擘罟竿雙脚赤
清波炤魚如可拾自見鬚眉還歷歷老妻背坐乳小兒
似厭大兒爭且索西船收綸唱歌返短楫弄波聲濤濤
一家妻子團圞頭三泖五湖供泛宅得魚換米日日飽
鮮鯉活鱸為黍稷漁船兩葉天地間翻覺船寬浮世窄
與漁傳神雪溪老滿眼江湖紙盈尺煙波情性漁不知

令漁見畫漁還惜

南峯餞別文溫州

先生移疾倦宦遊六年家居嬾下樓分符到門不可阻
欲行尚為鄉山留拌殮到處荀爛漫饒腹自詫文湖州
靈巖昨已紀勝集南峯未肯饒清幽斜陽半嶺溢人面
綠雲夾樹扶山兜村翁野衲亦追逐半路出酒勸且酬
禽聲下上太守醉直與歐老爭遨頭明朝鴈蕩洵奇美
但恐簿書山與讎不如抱被補一宿別後歲月其如流

朱澤民山水

睢陽老人營丘徒意匠妙絕絕代無為留清氣在天地
便就片紙開江湖長松落葉風細細幽構縈蘿倚江住
壁虎書魚蕩水光老屋疎茅通雨氣老人不歸空北山
芳杜春風應厚顏微官縛人萬事拙安得浮雲相往還
宦海黃塵迷白髮雲壑風泉清入骨思家看畫方兀然
叫落西窗子規月

經尚湖望虞山

日午放船湖上頭，虞山隨船走不休。
高雲仰見出翠壁，飛影下接滄波流。
青林人家隱山麓，雞鳴犬吠聞中洲。
鷗鷺羣棲竹葉暗，蜻蜓特立荷花秋。
蓮歌漁唱尚互答，落景在樹猶堪遊。
小舟爭渡各先去，獨逆風波渾不憂。

竹堂寺探梅

竹堂梅花一千樹，晴雪塞門無入處。
秋官黃門兩詩客，珂馬西來為花駐。
老翁攜酒亦偶同，花不留人人自住。
滿身毛骨沁冰影，嚼蕊含香各搜句。
酒酣塗紙作橫斜。

筆下珠光濕春露只愁此紙捲春去明日重來花在地
題杜東原先生雨景

老原作畫墨法熟紙上沉沉潑濃綠重林濕葉欲墮地
合礪流淙似鳴玉廬山九疊翠不乾秋影平吞此長幅
借看真怕雨拂面要為時人洗雙目滕王珠簾正堪卷
董家破屋不可宿出門一笑青天高猶怪春泥汙吾足
題光福畫卷

羣山西奔駐湖尾通川夾山三十里川窮小瀨開鏡光

居民次水屋比比屋上有山屋下水開門波光眼如洗
虎山橋畔晚市忙打鼓漁郎賣鮮鯉霜前橘袖萬包黃
雨後楊梅千樹紫山圍水抱開農桑樂土風光真畫裏
三年潢潦我無家恨不攜書亦居此

吳瑞卿染墨牡丹

雨晴風晴日杲杲趁此看花花更好澆紅要盡三百觴
請客不須辭量小野僧栽花要客到急埽風軒破清曉
知渠色相本來空未必真成被花惱吳生又與花傳神

紙上生涯春不老青春展卷無時無姚家魏家何足道

暑中題雪圖

六月添衣喚童子自畫雪圖茅屋裏玉花出筆飛上樹
慘澹陰山無乃是老生放筆還自笑顛倒炎涼聊戲爾
門前有客來借看滿眼黃塵汗如雨

史鑑

秋林會友圖

青山巖嶽凝紫霞飛泉如虹飲渥洼楓林接葉紅於花

上有鸞鶴下磨麋玉樓珠箔仙人家仙人顏色長美好
瑤池桃花得春早門前石楠秋葉香滿地綠雲風不埽
有客來遠方驅車陟羊腸車聲到門止揖讓升高堂高
堂奕奕凌雲漢瑤爵金盤青玉案華燈煌煌照宴嬉漢
女相妃出帷幔浮雲不行天欲低回風動地飛花亂悲
歡離合樂未央起視明星夜將半夜將半舞且歌發激
楚秦陽和巧笑兩頰生微渦蛾眉曼睩光騰波平生樂
事良蹉跎對此轉覺哀情多明朝忽驚雙鬢皤其奈流

光如箭何

題可菴老人寫竹

國初寫竹王舍人筆端生動妙入神風流太常繼其後
片紙一出人爭取可菴老人得此傳聲價在人尤赫然
江南賢豪動百數家家屏障生風煙前年寄我雪竹圖
天地黯慘雲模糊大枝橫斜小枝亞金鞭擊折青珊瑚
今年寫竹吳江縣寫出千人萬人羨鸞鳳盤空雲日翻
蛟龍出海風雷變鷗鵠無聲錦瑟稀湘娥披雲未遮面

老人老人勿自珍筆力轉多方絕倫高山流水志有在
莫謂識曲無其人

黃雲

煙江疊嶂圖為陳推官賦

趙家駙馬王晉卿畫筆直與造化爭寶繪堂開品神妙
煙江疊嶂新圖成東坡老人發天趣樹搖江色春空晴
武昌樊口五年住楚澤放臣同濯纓後來烏臺入詩案

嬌紅泣露啼春鶯

轉春鶯晉卿家姬晉卿與東坡同謫姬流落人間

兩翁富貴

春夢破寓意奚啻鴻毛輕後來吳興王孫規模亦神似
終遜舊本尤精英陳侯出佐山水郡桁楊晝卧莓苔生
挂之高齋一丈壁彷彿坐聽秋泉聲陳侯陳侯慎勿卷
還櫝或恐飛去難為情

羅燾

宿黃龍觀

杖藜迢遞尋仙源古祠遙見雲中旂空林山猿食栗響
深澤野獺銜魚喧道人步出懸厓下度竹穿松遠相訝

焚香邀入紫芝居為寫黃庭坐清夜

朱朴

贈張惟愛秀才

有美人兮山之陰我欲放舟何處尋
幾時射策蓬萊殿猶自讀書松桂林
神交千里夢已接詩社百年情獨深
芙蓉可折不可寄江水浩浩傷人心

祝允明

濟陽登太白酒樓却寄施湖州

昔聞董糟丘嘗為李白天津橋南造酒樓人間二子不
可見唯有傑句挂余心肺爛爛珊瑚鈎長安風沙住不
得南歸再卧蘇臺秋泊舟濟陽城買酒銷客愁登樓拜
先生進爵澆黃流知章不語先生笑飛花亂撲過樓頭
金陵更無鳳凰游岳陽莫將黃鶴留鄉關浮雲蔽落日
題詩却寄施湖州余為先生牛馬走湖州乃是賀老儔
西塞山杜若洲與爾相期釣鼈去千年江海同悠悠

顧清

為杜庠題山水橫幅

屋頭衆山森戟戟屋下寒溪深見石溪流循山若縈帶
別館離亭紛向背茅堂近水景絕幽繞簷萬竹風颼颼
主人自得濠上意終日俯檻臨寒流東寮把酒呼促席
隔屋糟牀晚猶滴清談北館風滿衣折梅寄遠情依依
山童晨起掃落葉不知松露霑荆扉經營布置各有態
頗覺畫者勞天機東吳杜郎江海客覽勝搜奇遍京國
家園十畝畫不如猶向丹青愛陳迹西風八月南鴈飛

扁舟遠自長安歸高堂無事兄弟樂終日雞黍要鄰比
新圖便是君家事何必區區詢畫師

為潘克承題林良蘆鴈

林郎花鳥今代奇水墨到處皆天機長縑闊幅信手揮
妙處不屬丹青圍江頭雨深菱荇肥枯槎折葦紛離披
鴛鴦羽冷畏遠飛雄雌兩兩相偎依靈苔翠羽不自危
鵲鵲噤語晞玄衣依棲俯仰各有姿乍見幾欲呼鷹師
乃知此老筆不疲市朝山林時見之雞林相君知白詩

君家此本吾無疑北風漸高禾黍稀雲飛日見江南歸
吳江洞庭三泖涯天空水遠無拘羈焉得扁舟從尔嬉
東園餞別太守酒酣劇論至於得失寵辱之際
聽之灑然是夕被酒齒痛不寐輒用蘇長公過
清虛堂韻歌以揚之卒章頌言為將來世講之
張本也

人間萬事真渥沙黃堂昨日猶早衙春風留人苦無計
漫天撲路飛楊花楊花飄揚泊何處碧山夢繞先生家

邯鄲已為魯酒誤憂喜更足憑晨鴉東園雨餘綠滿樹
猶有青子黏殘葩撫時惜別萬感集飄蕭短髮手屢爬
衆賓微酣我輕汗論功莫計酒與茶花奴羯鼓不解事
落日猛向紅闌撾盛時會須有代謝末俗正爾堪吁嗟
歸舟安穩足春夢夢抱玉燕吞流霞

四月十二日定菴先生過訪誦東坡過清虛堂
詩用韻奉謝

夜窗急雨鳴撒沙晨鼓不辯州官衙村童晏眠蓬戶閉

榆莢一徑交殘花經年不及長者室泥水真作田農家
高軒何自忽戾止豁若暝霧騰金鴉清容穆穆峙霜柏
妙語郁郁飛天葩塵埃塞胃不自理次第一一煩梳爬
盤餐菲惡愧草草幸有杞桮供春茶此時天公亦助喜
列缺捲燄雷停撾騷壇夙昔願奔走世事八九堪咨嗟
酒闌公去倚江閣遙見一鶴沖高霞

題計郎中汝和墨菊曹汝學家藏

郎中畫菊真是菊蒙泉蒲萄太常竹一時能事併馳聲

豈直文章難繼續

天順中賦云林良翎毛夏
景竹岳正蒲萄計禮菊

狂揮急掃

皆稱意不特品高機亦熟西涯坐間生色障一見當時
心已服不知何日到君家淨洗朱鉛鬪清淑疎篁古木
交映帶深淺生枯俱入態欹風一枝驚欲折倚竹數叢
如有待飛鸞墜羽時自壓老蛟蛻骨令人駭張顛草聖
久寂寞何意茲晨忽傾蓋

君畫筆皆
草書法

郎中郎中今有無

後來尚遠眼中疎柔肌脆骨爭媚嫵不然蔓草紛黃蘗
頽波一去誰與返把卷撫玩增長吁君不見近時淮海

上亦有菊花一派往往傳京都

放船作

時初中
鄉舉

潛魚不出鰲栖鳥不出林不因風雷便豈識天地之大
江湖深天風颭颭吹黃槐江船擊鼓凌晨開雲帆悠悠
渡三泖使我塵襟豁如埽將軍祠前芳草多陰廊古瓦
封苔窠英雄恨殺白衣槽千載此地還來過陳湖北行
勢尤大氣象渾疑在天外波光黯慘迷西東我疑此處
藏蛟龍同舟之人半失色驚雷歛雪吹腥風出門咫尺

已如此況乃天涯千萬里

筠屋為徐庭美賦

徐君愛竹如愛玉種竹成林密如束林間結屋三四楹
自說此生心事足闌干一徑曲復曲落翠飛青暗人目
我疑月明深夜中定有青鸞屋頭宿

秦金

次韻馬文明會同年

春官昔日曾推轂萬里青霄同奮足閱人渾是沙揀金

顧我真慚葭倚玉，醉向東風促馬蹄。
宴罷歸來曲江曲，花枝烏帽笑欹紅。
柳帶宮袍驚染綠，小臣何幸感遭逢。
聖主無勞資夢卜，卓哉忠孝是良圖。
漫爾榮華匪私祝，唯君好事尤好文。
長夏開筵思秉燭，情深樽俎笑談間。
片紙微詞並收錄，獻酬終日已百拜。
出門送客猶三肅，卉木庭除倍有輝。
飯芻僕馬皆蒙福，高秋風月正撩人。
我亦試將嘉會續。

朱諫

贈黃萬峯

大山若遊龍蜿蜒直落滄海中小山若奔馬遲迴蹴踏
青雲下會稽分支到天姥鴈蕩盤根接玄圃丹丘仙人
居紫巖玉液金沙映窗戶淡淡松竹陰日與紅塵遠悠
悠杖屨間安知有軒冕柴門不聽車馬聲春風滿地黃
鶯鳴門前芳草倚天碧酒壺自對南山傾

遊鴈山與橋姪

天柱峯前多古木芙蓉菴下仙人宿春風吹落碧桃花

子規啼裂山頭竹十年來往龍湫上一雨芒鞋一枝杖
飛流千尺落深潭白雪紛紛洒青嶂白髮看山愁日短
好景招人及春暖我家小阮帶青錢提壺又向花間轉
老夫樂事在天倫人間此樂方為真

王守仁

重遊開元寺戲題壁

中丞不解了公事到處看山復尋寺尚為妻孥守俸錢
至今未得休官去三月開元兩度來寺僧倦客門未開

山靈似嫌俗士駕溪風攔路吹人回君不見富貴中人
如中酒折翬解醒須五斗未妨適意山水間浮名于我
亦何有

張琦

黃昏步溪上見煙月可愛

明月在天煙在溪煙中看月無光輝沙禽熟眠潮未響
野火厯亂船初歸天邊楊柳誰家樹煙月相舍不知數
此時幽景記不真莫是江南夢歸路

次夜又步溪上

月色不減昨夜好秋霽家家夜飯早蔓青芋子白酒香
土門竹舍黃花老農談悠悠靜可聽皆說官家今太平
斗斛上倉不過槩差船點馬無兼丁翁哺弱孫婦抱子
依依相對桑麻裏我願明月常此光不照離愁照歡喜

周用

耕雲

桐丘先生笑開口問我湖田不知畝一卷神農百穀經

今日居然落我手農夫十耦牛十角公家什一我什九
大田之稼歲十千與公歲歲為春酒

張玉湖再惠呂梁石硯并石筆閣次韻以謝

何人贈我方尺硯上有雲頭和雪片玉湖不來鑿呂梁
吁嗟此物何由見女媧鍊石曾補天得之自我今三年
為君閣筆復歎息衰謬他時那可傳

魯鐸

漁景四首

桃柳穠纖含曉濕，篷背晴曦晒蓑笠。
汀洲草芳鳬鴈飛，江風撲岸炊煙急。
中湖布網却伊誰，作力包羅意恐遲。
春深欲勸同休息，正是魚龍孕子時。

江水朝來忽然漲，鷓鴣作陣魚初上。
得魚遠趁江上墟，深樹柴門午雞唱。
盈尺琴高錦作鱗，漁翁出手驕墟人。
價平勸爾正須賣，此迴天氣非侵晨。

江蘆黃盡江楓赭，遠岫幽村景堪寫。
隔岸腥風生巨罾，能知一舉魚多寡。
曉冒鄰艇臥斜暉，浦口人家欲掩扉。

停舟試看橫橋上誰荷小冒歌唱歸

湖天映雪如銀甕湖水朝來欲成凍潭底寒魚貴似金
高人夙約遙相送推窗慰勞冰在鬚仍敕僮奴辦早廚
隔汀為問幾家住曉爨都生煙火無

古塔灘

古塔灘注山窪飛湍屈曲如奔蛇中流惡石故激怒跳
珠濺雪紛交加鏘鏘爭走萬甲士刺刺倒露千狼牙官
舟一葉百夫挽安危祇與毫釐差我時攀巖過絕壁四

顧莫非援所家倦來坐石却俯看握拳吐舌生咨嗟九
龍山史好奇甚哦詩但道山水佳更嗔來日舍舟去磨
崖不及親鐫過

孫偉

雪航口號

長江瀉水下建業海門潮色動眉睫北風連山卷雪飛
波底客舟凍一葉爾時木落江亦空舵牙撞水江之東
萬鴉僵立礪石暗遙見縷縷茶煙紅城頭老樹低幾尺

雲裏看山千仞壁斷浦折葦僻沙港冷光直射蛟龍室
青山渡口月出皓鷺嶺夜半鐘聲到當壚一笑任吳姬
醉著蓑衣脫貂帽也不作周公夢也不歌楚狂鳳也不
學淮南王問仙人也不學劉更生叅道衆雪下淺渚邊
雪晴輕浪前金烏浮光出海底卯酒正睡江天船

徐問

送王伯存守雷州

雷陽古城瀕海曲路入炎荒莫南服長安萬里化不流

故遣郎官領符竹郎官久負卓犖才一麾五馬從天來
鴻名歟到遠人耳旆旌雙引煙雲開縈紆山縣雞聲早
候火煌煌連古道十賢名在祠宇荒君去還須問遺老
我懷同舍心悠悠夕陽望斷江楓秋天空海闊會何日
聚首還期鵷鵲樓

寄功甫歸隱東麓

孤塵積翠連雲起北走金陵枕江水山形繚繞如蜿蜒
中有幽人隱居里芙蓉石室開葱蘢赤日照耀神仙宮

山雞野鶴自啼舞長林聲散洪濤風主人歸來未頭白
卜築緣山傍川脉歌詞洗盡沙土痕野堂愁絕鶯花魄
知君獨往歲月長戶庭哀壑流輝光安得驅我置汝傍

東山孤高遙相望

孤塵
山名

登蓬萊閣和坡公海市韻

地維汨沒東南空元氣混接蒼冥中懸崖石壁置臺觀
凌虛下瞰馮夷宮竹山參差海市起鬼斧運出天然工
旌旗城郭儼相向靈氣鬱積噓蛟龍須臾市隱海色定

誰與志者蘇長公清詩高起雲閣胸水為吞吐山為雄
風流文采今安在空有勝事傳無窮東牟太守每自苦
偶來見丈心冲融寒潮湧日下孤島回聲聒亂晨昏鐘
村晴遙見沙路豁農夫往往歌年豐人生所至貴適意
奚必歎老悲青銅輾然一笑下山去不覺兩腋生天風

陸深

月夜與高進之沈德楨諸友過蕲山次驛間韻
權歌欲停山月吐月影照人清可數疑心已斷驛間蛇

壯氣猶驚草中虎清溪曲曲淡不流此月重來猶故我
秋思

空庭蕭索簾櫳雨秋色漫漫四山裏開花不語傷朱顏
落葉無聲風未起依稀三五少年遊鳳皇臺畔臨吳楚
家書自怪滿紙題猶剩胃中數行語

張邦奇

題畫

鳩性愛雨花愛晴同倚東風不同情春光二月濃於酒

雙鳩醉寐不復鳴雙鳩不鳴花相語無令鳩醒叫天雨
鷹逐鷺圖

我觀羣鳥中除却蒼鷹盡凡羽君不見黃金眸白玉距
凌空一下急于雨鷺鷥何不早竄伏到此驚奔向何許
憶昔在林皋翻飛矜羽毛羽毛雖好不中用憑君識取
眞英豪

孟洋

顧全州見邀江水漲不能赴

桂林山深晝啼鷓一春三見紅日出鳴雷達曙雨浪浪
洪潦平階仍入室江間浪湧蛟螭翻鯉魚安得窺龍門
渡頭行子立惆悵徒繫扁舟不可上美人只在水一方
百遡千迴道轉長雨中空見枇杷落飛盡楊花更斷腸

送僉憲李君惟大入關中

秦中昔遊地西望送行旌雨雪經淮甸春風入洛城洛
陽城中足高彥君過故里多歡宴天津橋邊新柳絲桃
林花暖啼鶯徧紫氣函關路青蓮華嶽祠五陵富貴空

流水四塞煙塵異往時使君按節行風俗白日青雲照
巖谷雲陽縣前涇水深召公亭下春蕪綠中興天子緩
刑威四海謳歌仰德輝從容攬轡長安道早晚風聲達
紫微

殷雲霄

贈太初石川巾

昔予獨釣東流津赤脚踏石頭冠雲亂髮垂耳不受束
時時裹頭石川巾四角岳岳不肯折方峯高桶雙纓裂

邇冠章甫從折胥碧海蒼波自淪雪
太白山人西南來
風神虛朗無塵埃
翩然相贈真不忝
山精海若驚崔嵬
幾年疲繭勞風塵
墨綬銅章愧此身
他時顧我日觀上
被髮與子騎麒麟

呂梁

呂梁之道石齒齒
中有波濤聲沸騰
淺瀨詎堪蛟龍住
遠客翻疑神鬼憑
進帆揚子渺煙霧
聽潮錢塘來風霆
何如小艇石川去
曲肱涼月明芳汀

倪宗正

題網魚圖

白白江波紅尾魚
蒲花初發柳花疎
江洲日暮忘歸去
江魚上網不知數
風雨欲來猶不來
箬笠且挂磯頭樹

李夢陽

劉子有金陵之差
遂便覲省

使君昔居紫荊關
日登燕嶠望吳山
逢人顏色鬱黯黯
對酒涕泗交潺湲
使君南向金陵去
孤帆夜拂春天樹

旅枕常欹月落時夢魂先到雲飛處揚子江頭青草斜
大孤山前開杏花行人三月重回首遊子一年初到家
出門煙草滿芳甸鳳皇臺接麒麟殿遊陌聯翩追宿娛
墨場婉孌羅賓讌人生意氣無南北白馬青袍動江色
即看艤舸石頭城還問稅鞅鍾山側鍾山翠律壓秦淮
燕趙風雲入望來芙蓉秋鴈多愁思問君何日錦帆迴
二月四日部署宴餞徐顧二子

春日載陽官署幽東吳二子過我游庭空日斜吏人散

窅然何異經林丘
今晨驚蟄暖氣達
昨夜哀鴻呼故儔

中庭古槐蒼蘚縟
上有百鳥何啁啾
倉庚交交刷其羽

君看巨細各有求
明時冠軒幾邂逅
得暇胡不攀淹留

自從去年識徐顧
令我意氣傾南州
徐郎近買洞庭柁

顧子亦具錢唐舟
浮生飄轉若飛蓬
倏忽聚散誰能謀

風光爛漫沉復爾
願寫清壺消客憂
故人苦稱不好飲

舉杯入脣還復休
妙歌時時激慷慨
鄙夫何以荅綢繆

嚴柝沉沉靜夜色
北斗倒挂城南樓
祇恐天明驅馬出

攬袂延望河之洲

徐子將適湖湘余實戀戀難別走筆長句述一代文人之盛兼寓祝望焉爾

崢嶸百年會浩蕩觀人文建安與黃初叱咤皆風雲大
厯熙寧各有人夏金敲玉何繽紛高皇揮戈造日月草
昧之際崇儒紳英雄杖策集軍門金華數子真絕倫宣
德文體多渾淪偉哉東里廊廟珍我師崛起楊與李力
挽一髮回千鈞天球銀甕世希絕鼇掣鯨翻難具陳洪

川無梁不可越日暮悵望勞余神徐郎生長蘇臺陰二
十作賦雄海濱竭來抱玉叩閭闔長安繡陌行麒麟是
時少年誰最文太常邊丞何舍人舍人飄飄使南極直
窮金馬探瀘津爾雖不即見顏色夢中彷彿形貌真余
也潦倒簿書客諸公磊落清妙身大賢衣蓋豈虛擲應
須爾輩揚其塵休令黼黻怨岑寂要與琬琰增嶙峋海
陵先生雅愛士晚得徐郎道氣伸喬王款接雖不數邇
聞亦欲來卜鄰驂騑造父兩相值一瞬萬里誰能馴都

門二月芳草發御溝楊柳垂條新徐郎綰牒將遠適使
我旦夕生悲辛為君沽酒上高樓月前醉舞梨花春天
明挂帆向何處鴻鴈哀鳴求故羣南登會稽探禹穴西
浮湘水弔靈均洞庭波寒木葉下峽口風急猿嘯聞司
馬太史有遺躅歸來著書追獲麟

潯陽寄毛君湖口

大江六月涼風發匡廬清波滾明月削出萬朶青芙蓉
水底搖動金銀闕美人盈盈坐湖縣昏叩石鐘曙晞髮

悵望迢迢碧雲合早晚扁舟向蠻越

何景明

寄李空同

黃河臘月冰十丈縱有鯉魚那得上楚天鴻鴈避霜雪
未得逢春難北向康王城邊沙草曛梁王臺上多暮雲
野人歲晚誰相對桐柏山中空憶君

畫魚

大魚昂藏若人立衝波跋浪風江急旁觀二鯉各有神

倏忽波濤隨出入中堂
鬢鬢動杳冥坐久始識為丹青
青天萬里拂綃素筆力咫尺開滄溟
禹門天池雲霧裏白晝雷霆行地底
何人有力移置此酒酣相視一改容
只恐化作三蛟龍

古松

岳州地多古松樹千株萬株植官路
故老猶能記歲年行人不解知朝暮
臨江西來煙霧起夾古連山一百里
黛色寒通七澤雲秋聲夜捲三江
水郡城之北江水東

鄂王祠廟丹青空英雄為謨本宏遠古木至今多烈風
忠魂義魄杳何在故物依然見遺愛繁枝百世人不翦
直氣千尋我當拜六年前過蒲圻城古松陰中三日行
空山倒挂雷雨黑盛夏常貯炎風清郵亭傳舍總蕭瑟
鬱抱煩襟亦飄逸迴巖峭壁奔洪濤老蔓長藤翻白日
只今復向巴丘道野草漸多松漸少仄徑孤根半蝕苔
夕陽幾樹空垂蔦昔時所見合抱材斷枝落葉隨蒿萊
過客山中想清籟行徒道上愁黃埃輦山輿嶺萬千重

半作豪家樓上棟古人之力今人勞大厦明堂不得用
年年官吏催斧斤故老雖怒那敢嗔傍枝出地子成樹
野婦山樵推作薪驛前數榦聊可數我忽見之再三撫
霜皮露甲如虬蟠霧鬣煙鬟學龍舞陰森氣象凜猶昔
翠色長標不可侮荒林曠野識者稀終為誰家起廊廡
回首鄂廟秋山阿廟前之樹無高柯鬼神呵護亦徒爾
英靈不返將如何達人且勿怨搖落志士胡為傷輶軻
君看世事盡如此拔劍聽我松前歌

懷舊吟贈阮世隆

君家華樓對芳樹開宴曾留三日住銅槃絳蠟暖照春
金壺銀漏寒催曙知君重義多豪遊滿門賓客為我留
珊瑚不避鐵如意驂騑皆纏金絡頭爾時北上與君別
蔡州城外花如雪夢裏猶尋汝上雲醉中却憶淮西月
丈夫富貴各有因如君立身亦不羣行年四十未白髮
生兒十八期青雲君從秋日遙分手我向東風一回首
山下長寒舊薜蘿樓前應長春楊柳

明月篇

長安月離離出海嶠遙見層城隱半輪漸看阿閣銜初
照潋灩黃金波團圞白玉盤青天流景披紅蕊白露含
輝汎紫蘭紫蘭紅蕊西風起九衢夾道秋如水錦幌高
褰香霧開瑣闌斜映輕霞舉霧沉霞落天宇開萬戶千
門月明裏月明皎皎陌東西柏寢峒崑望不迷侯家臺
榭光先滿戚里笙歌影乍低濯濯芙蓉生玉沼娟娟楊
柳覆金堤鳳凰樓上吹簫女蟋蟀堂中織錦妻別有深

宮閉深院年年歲歲愁相見金屋螢流長信階綺櫳燕
入昭陽殿趙女通宵侍御牀班姬此夕悲團扇秋來明
月照金微榆黃沙白水逶迤征夫塞上憐行影少婦窗
前想畫眉上林鴻鴈書中恨北地關山笛裏悲書中笛
裏空相憶幾見盈虧淚沾臆紅閨貌減落春華玉門腸
斷逢秋色春華秋色遞如流東家怨女上妝樓流蘇帳
捲初安鏡翡翠簾開自上鉤河邊織女期七夕天上嫦
娥奈九秋七夕風濤還可度九秋霜露迴生愁九秋七

夕須臾易盛年一去真堪惜可憐揚彩入羅幃可憐流
素凝瑤席未作當壚賣酒人難邀隔座援琴客客心對
此歎蹉跎烏鵲南飛可奈何江頭商婦移船待湖上佳
人挾瑟歌此時馮闌垂玉筍此時滅燭斂青蛾玉筍青
蛾苦絨怨絨怨含情不能吐麗色春妍桃李蹊遲輝晚
媚菖蒲浦與君相思在二八與君相期在三五空持夜
被貼鴛鴦空持暖玉擎鸚鵡青衫泣掩琵琶絃銀屏忍
對瑩篴語瑩篴再彈月已微穿廊入闥靄斜輝歸心日

遠大刀折極目天涯破鏡飛

徐禎卿

荅顧郎中華玉

昔居長安西今居長安北蓬門臥病秋潦繁十日不出
生荆棘牽泥匍匐入學宮馬瘦翻愁足無力慵疎頗被
諸生譏虛名何用時人識京師賣文賤於土飢腸不救
齏鹽食去年作吏在法曹月俸送官空署職牀頭一甕
不滿儲囊裏無錢作沽直歸來困頓不得醉兒女荒涼

婦歎息今年調官去懊惱苦笑先生祿太嗇釜中粟少
作糜薄白碗盛來映膚色丈夫但免溝壑辱日飲藜羹
勝羊肉平生富貴亦何有羸軀幸自弛耕牧但願時豐
民物安官府清廉盜賊伏人人鼓腹厭梁菽先生雖病
甘苜蓿一朝雷雨濯亨衢坐見諸公執中軸先生脩然
卷懷退茅齋歸向南山下

唐生將卜築桃花塢謀家無貲貽書見讓寄此

解嘲

予昔攀白日虹蜺干紫庭浮沉帝座側無人知歲星側
待公車無所歡聊騎天馬出長安南下滄江浮七澤還
攜謝客弄波瀾青倪中開秀廬嶽瀑布灑入千峯寒冥
冥仙氣貫南斗直欲凌身燒大丹迴裾西拂巫山浦浩
蕩歡心間雲雨歸來欲奏楚王書漢主上林方好武黃
金不遇心自吁白璧無媒翻見侮昨日結交燕少年酣
歌擊筑市中眠正逢天子失顏色奪俸經時無酒錢入
門百結鸛鸛盡笑立文君明鏡前却思舊日高陽侶黃

公酒壚何處邊天下綈袍誰不憐却卿未具山中橐何
人為買剡溪田唐伯虎真俠客十年與爾青雲交傾心
置腹無所惜擊我劍拂君纓請歌鸚鵡篇為奏朱絲繩
胡為擾擾蒼蠅之惡聲我今蹭蹬尚如此嗟爾悠悠世
上名

送熊士選侍御

壯士樂長征門前邊馬鳴春風三月柳吹暗大同城蘆
溝橋下東流水故人一樽情未已遙天飛盡隴頭雲唯

見居庸暮山紫羨君鞍馬速流星予亦孤帆下洞庭塞
北荆南心萬里佩刀長揖向都亭

觀伯虎寄贈子容洞庭山圖因求作廬山障子
丹巒氤氲拂空起素練平鋪洞庭水迴溪笑指毛公家
忘却滄溟幾千里我隔廬峯夢紫煙嘗騎白鹿上青天
煩君貌出仙人障西寄長安向日邊

寄華玉

去歲君為薊門客燕山雪暗秦雲白馬上相逢脫紫貂

朝回沽酒城南陌燕山此日雪雰雰祇見秦雲不見君
胡天白鴈南飛盡千里相思那得聞

送許伯基侍御

花驄向青草二月金陵道燕橋故人走相送提攜玉壺
為君倒早鶯刷羽出垂楊御水流漸繞鳳皇君去幾時
青鳥至赤霄銜上綵雲章

送吳學士姪奎觀模米襄陽山水圖并學士題


識

昔上黃鶴樓西望襄陽堤襄陽草樹淡於染清猿落日
令人迷歸來復見襄陽畫銀海珠源恍餘派楚山沉沉
煙霧高淋漓七澤翻波濤漁舟買舶入點綴竹林楓樹
懸江皋白雲縹緲蒼梧遙旖如湘君垂素旄我欲乘風
向空舉拄杖呼雲雲不起山中蘿薜不可親悵望伊人
隔秋水延陵學士襄陽儔對此踟躕搔白頭碧山心期
竟已矣回首歲月成墟丘猶有篇章未磨滅教人空憶
舊風流

送友

平原蒼蒼孟冬月行子辭燕指吳越淮水橋邊賣酒家
停車幾處梅花發羨爾侯門早拂衣柴桑舊里角巾歸
白酒山中新芋熟清楓江上蟹螯肥閉門松竹依然在
一曲參差醉落暉

御選明詩卷四十三



總校官庶吉士臣侍朝

校對官檢討臣蕭九成

謄錄監生臣傅瓌芳